

Fikiran Melayu dari Mesir

Sendi Kelemahan Kita

Dalam bilangan Qalam yang lalu, penulis makalah ini telah mengupas soal kelemahan kita dalam ekonomi dan pelajaran, dan sebagai penutupnya pada kali ini beliau pula mengupas soal ini dari segi masyarakat dan percaturan siyasah.

(Oleh: Hashim Ahmad Ali)

Segi Masyarakat

Dalam mengkaji masalah masyarakat kita harus memandang kepada susunan ekonomi negara. Suatu perkara yang tak dapat disangkal lagi ialah baik atau buruknya keadaan masyarakat adalah terhenti di atas susunan ekonomi. Ini bererti bahawa masalah masyarakat ada mempunyai hubungan yang erat dengan masalah ekonomi. Kedua-duanya tak dapat dipisahkan dari satu sama lain.

Oleh kerana Malaya adalah sebuah negara pertanian serta masih mundur dalam lapangan ekonomi maka tanda-tanda kemiskinan dan kemuduran sangat-sangat nyata. Salah satu daripada tanda-tanda itu ialah kerendahan taraf kehidupan penduduk terutama sekali dari bangsa kita Melayu, iaitu seramai 75.1 peratus daripada jumlah umat Melayu bergantung kepada pertanian sebagai sumber mata pencarian.

Dua perkara yang dianggap sebagai penyakit telah menjalar ke dalam masyarakat kita di Malaya, pertama perkembangan penduduk dengan secepat-cepatnya, dan kedua perkembangan pelacuran di bandar-bandar.

Penduduk Malaya dari setahun ke setahun bertambah

dengan hebatnya sehingga meningkat kepada 3 peratus setahun. Ini adalah suatu angka yang paling besar sekali di dunia jika dibanding dengan kelemahan ekonomi kita. Selain daripada itu usaha-usaha membina ekonomi Malaya belum lagi berjalan setimbang dengan perkembangan penduduk-penduduk dan akibatnya ialah kerendahan taraf kehidupan penduduk seluruhnya dan kerendahan taraf kehidupan menyebabkan buta huruf yang dianggap sebagai malapetaka juga. Oleh itu adalah menjadi tugas kerajaan Tanah Melayu menjalankan usaha-usaha untuk menghindarkan kemungkinan¹ berlaku perkara-perkara yang tidak diingini itu.

Masalah pelacuran juga tidak kurang bahayanya

bagi masyarakat. Kita merasai dukacita apabila mendengar bahawa ada di antara kaum intelek kita yang bersuru supaya kerajaan menghalalkan pelacuran dengan memberi lesen-lesen kepada pelacur-pelacur. Setengah daripada atas bagi pendapat mereka ialah kerajaan dapat memungut hasil-hasil dengan jalan memberi lesen kepada mereka. Nampaknya kaum

¹ sebetulnya ‘kemungkinan’

intelek kita ini hanya memandang dari jurusan kebendaan sahaja, tetapi membelakangkan soal akhlak.

Pada pendapat kita faedah-faedah yang diharap dari pemberian lesen kepada pelacur-pelacur itu adalah sangat sedikit jika dibandingkan dengan bahayanya. Selain daripada itu kita mesti ingat bahawa negara kita merasmikan Islam sebagai agama negara, sedangkan masalah pelacuran adalah bertentangan dengan ajaran Islam.

Kalaular perasmian Islam sebagai agama negara Malaya Merdeka adalah semata-mata bertujuan untuk memikat hati rakyat Malaya terutama bangsa Melayu yang beragama Islam atau untuk mematahkan perjuangan setengah parti yang berbau Islam, maka hal ini kita tidak dapat mengatakan apa-apa. Tetapi apa yang dipercayai ialah pemerintah kita memang mempunyai hati yang ikhlas serta jujur dalam soal agama. Pendek kata masalah pelacuran

alah suatu perkara yang rumit di mana-mana sahaja. Tetapi didapati setengah-setengah kerajaan masih lagi mengharamkannya. Jepun adalah sebuah negara yang bukan Islam tetapi meskipun pelacuran merebak sehebat-hebatnya di sana, namun kerajaan tetap mengharamkannya. Maka sudah tetap menjadi suatu keaifan² sekiranya Malaya menghalalkan pelacuran kerana hendak mencari sumber baharu bagi pendapatan negara. Kita harus berwaspada dalam hal ini.

Dalam mencegah pelacuran dari merebak sebebas-bebasnya, kita harus menyelidiki beberapa perkara. Pertama dari manakah datangnya pelacuran-pelacuran dan kedua apakah sebab-sebab yang menimbulkan pelacuran. Pada pendapat kita kebanyakan dari pelacur-pelacur bangsa Melayu (kita bercakap hal ehwal orang Melayu kerana usaha kita ialah untuk mementingkan kebaikan mereka) datangnya daripada kampung-kampung. Jarang sekali kita dapat pelacur-pelacur itu terdiri dari orang-orang bandar. Ini disebabkan kedudukan ekonomi kampung sangat-sangat buruk sehingga banyak rakyat menderita. Lambat-laun mereka yang menjadi mangsa kepapaan akan terjerumus ke dalam lembah pelacuran. Maka alangkah mustahaknya kemajuan kampung diberi perhatian yang penuh. Ini adalah penyelidikan dari segi ekonomi, tetapi dari segi kemasyarakatan pula tak kurang pentingnya dipelajari untuk memahami sebab-sebab perkembangan pelacuran. Setengah daripada sebab-sebab itu ialah kelonggaran undang-undang kahwin dan cerai. Kebanyakan orang-orang Melayu di kampung berkahwin sewaktu umur masih muda. Si lelaki belum lagi dapat berdiri di atas tapak kakinya sendiri dalam mencari sara hidup sedangkan si isteri belum lagi tahu

Buku-buku untuk umum dan sekolah-sekolah:

| | |
|--|--------|
| 1. Pelajaran Sembahyang I | \$1.20 |
| 2. " " II mengenai imam, makmum, masbūq, jenazah dan lain-lain | \$1.20 |
| 3. Mari Sembahyang (untuk kanak-kanak lelaki) | \$1.20 |
| 4. Mari Sembahyang (untuk kanak-kanak perempuan) | \$1.20 |
| 5. Ibadat Rasulullah (S.A.W.) (tinggal sedikit) | \$3.00 |
| 6. Panduan Membaca dan Menulis Jawi | \$1.50 |
| 7. Baca I | \$1.00 |

Buku-buku Sejarah

| | |
|---|--------|
| 1. Muhammad ṣallā Allāh 'alayhi wa sallam 1 | \$1.20 |
| 2. Muhammad ṣallā Allāh 'alayhi wa sallam 2 | \$1.20 |

² kesalahan teks, sebetulnya 'keibaikan'

sebenar-benarnya akan kewajipannya dalam kehidupan perkahwinan.

Oleh itu banyak didapati bahawa perkahwinan mereka gagal dan menyebabkan perceraian. Inilah satu daripada beberapa sebab merebaknya pelacuran, dan pelacur-pelacur itu untuk mencari sara hidup akan beransur-ansur muncul di bandar-bandar.

Segi Ekonomi Bangsa Melayu

Semenjak dari sepuluh tahun yang lewat negara kita telah berada di bawah ancaman komunis. Pergerakan komunis di Malaya bertambah kuat selari dengan pergerakan Komunis Internasional. Kita tidak dapat menyangkal bahawa perjuangan komunis di Malaya adalah sesuku daripada perjuangan Komunis Internasional yang dipelopori oleh Moscow. Maka apakah akibat ancaman ini terhadap negara kita?

Mengikut kira-kira perbelanjaan Malaya tahunan, kita dapati bahawa kerajaan Malaya sangat-sangat mementingkan masalah pertahanan lebih daripada masalah pembangunan ekonomi dan perkhidmatan masyarakat. Dalam tahun 1949 kerajaan Malaya ada membelanjai wang sebanyak 82 million ringgit kerana pertahanan. Perbelanjaan itu meningkat dari setahun ke setahun sehingga dari tahun 1951 kepada tahun 1953 perbelanjaan untuk pertahanan adalah lebih daripada 200 million ringgit setahun. Sedangkan perbelanjaan untuk kemajuan ekonomi ialah sebanyak 78 million sahaja. Maka betapa besarnya bezanya di antara perbelanjaan untuk kemajuan ekonomi dan perbelanjaan untuk pertahanan. Akibat dari itu ialah masalah kemajuan ekonomi tidak dapat dijalankan seluas-luasnya sedangkan taraf kehidupan rakyat makin merosot.

Ada suatu perkara yang aneh yang menarik pandangan

kita, dalam hal keadaan negara kita ini diancam oleh komunis, ada juga di antara ahli-ahli siyayah di Tanah Melayu yang berseru supaya negara kita Malaya berpegang dengan dasar berkecuali yang tegas dalam siasah luar negeri. Jika dipandang kepada seruan ini kita dapati tujuan itu adalah sangat-sangat bertentangan dengan apa yang diharap sekarang ini di Malaya. Buat masa sekarang kita tidak harus berdiri dengan berkecuali dalam pergolakan siasah *international* oleh kerana negara kita selama ini diancam oleh suatu kuasa asing yang menyamarkan diri di sebalik rakyat Tanah Melayu sendiri. Kita telah mengorbankan wang yang tidak sedikit untuk menentang komunis oleh sebab kita faham bahawa ideologi komunis itu tidak sesuai dengan suasana hidup kita serta bertentangan dengan agama kita. Kita tidak reda melihat negara kita dijadikan gelanggang pertempuran dan perjuangan bermacam-macam ideologi. Selagi kita mengaku bahawa Islam adalah agama rasmi bagi Tanah Melayu, selama itulah pula kita akan memperjuangkan supaya pengakuan kita itu akan mempunyai erti kata yang sebenar-benarnya. Ini harus disedari oleh setengah golongan yang melampau di Malaya. Maka buat masa sekarang kita tidak layak berpegang dengan dasar berkecuali dan sewajibnya bagi tiap-tiap seorang penduduk Malaya menyumbangkan tenaganya masing-masing untuk membina Malaya dan bukan untuk membawa ideologi-ideologi yang karut dan mengelirukan fikiran. Maka alangkah besarnya kewajipan kita untuk menghadapi dan menghapuskan segala saki-baki anasir-anasir yang merosak negara kita supaya dapat kita hidup dengan rukun dan damai.